

Messadi pertuccont il relasch dalla lescha davart il traffic ed il parcar dalla vischnaunca Ilanz/Glion (supplement)

Preziau signur president dil parlament
Stimadas parlamentarias, stimai parlamentararis

Il parlament communal Ilanz/Glion ha retschert il messadi pertuccont il relasch dalla lescha davart il traffic ed il parcar dalla vischnaunca Ilanz/Glion dils 30 d'uost 2023, sin il qual ei vegn fatg attents. La deliberaziun dalla lescha davart il traffic ed il parcar dalla vischnaunca Ilanz/Glion era prevedida per la sesida dil parlament communal dils 25 d'october 2023. La tractanda ei vegnida spustada per motivs da temps.

Sin fundament dils resuns dil parlament communal Ilanz/Glion ha la cumissiun aunc inagada verificau il sboz dalla lescha. La «cumissiun lescha ed ordinaziun da traffic» vegn menada dalla suprastonta communal responsabla, Caroline Gasser Curschellas. Il parlament communal vegn representaus ella cumissiun dad Ursin Cajochen, Daniel Candinas, Tarcisi Cavigelli, Manuel Montalta e Thomas Zinsli. Era il president communal, Marcus Beer, ch'ei responsabels per damondas giuridicas e Martin Capeder, che cuviera il turissem sco era las fracziuns da Castrisch e Duvin, fan part dalla cumissiun. La cumissiun vegn era integrada ella realisaziun ed aschia oravontut a cooperar tier l'elaboraziun dall'ordinaziun davart las ordinaziuns da traffic ed il parcar dalla vischnaunca Ilanz/Glion (Ordinaziun da traffic; Otr)

Explicaziuns davart las ulteriuras midadas dil sboz dalla lescha

art. 1 al. 3 (midau)

La vischnaunca sa preveder ellas diversas fracziuns differentas regulaziuns e ~~taxas da diever~~.

Remarca: Las differentas regulaziuns cuntengnan las differentas taxas da diever.

art. 5 al. 1 (niev art. 29, entochen uss art. 5)

Vehichels plazzai aschia ch'els impedeschan il traffic sa la vischnaunca schar allontanar sin cuost dil possessur ni digl utilisader responsabel, sche quel sa buca vegnir contonschius a temps util ed igl impediment caschuna in prighel per auters utilisaders dalla via ni sch'in trapass ni la rumida da neiv vegnan grevegai.

Remarca: Menziunar sut XI. Disposiziuns penalas pli raschuneivel (allontanar vehichels sco mesira suenter las multas disciplinaras).

art. 9 al. 1 (niev, entochen uss art. 10)

~~Il parcar sin terren public enteifer il territori da habitar ei da principi sutta mess a taxas.~~ La vischnaunca sa incassar taxas da parcar sin terren public. L'obligaziun da pagar taxas vala per ils parcadis ch'ei menziunai ell'ordinaziun. Excepziuns dall'obligaziun da pagar taxas vegnan regladas ell'al. 5 suandonta.

Remarca: Cun quella precisaziun vegnan l'obligaziun da pagar taxas sco era las excepziuns cheutier descrettas.

art. 17 al. 2 (midau, entochen uss art. 18)

Ina lubientscha dalla vischnaunca per il diever d'in vehichel cun tschenta vegn mo dada sche tal posseda in document dil vehichel ~~e sche la persuna posseda la patenta da manischunz per la categoria da vehichels corrispundenta.~~

Remarca: Era autras personas san manischar in vehichel cun tschenta. Plinavon schai la cumpetenzza da controllar las patentas da manischunz buca tier la vischnaunca. Per conceder ina lubientscha ei sulettamein il document dil vehichel necessaris.

art. 18 al. 2 (niev, entochen uss art. 19)

Survetschs da salvament e sanitars sco era ulteriuras organisaziuns cun engaschaments d'urgenza san dumandar la vischnaunca per ina lubientscha senza limitaziun dil tschancun.

Remarca: Talas stipulaziuns mauncan el sboz dalla lescha oriund. Cheutras san engaschaments d'urgenza cun vehichels cun tschenta vegnir reglai (cunzun survetschs per il manteniment dall'infrastructura, reparaturas urgentas ni semegliant).

art. 19 al. 1 lit. d (midau, entochen uss art. 20)

Ils suandonts documents ein d'aschuntar alla damonda:

...

~~d. ina copia dalla patenta da carrar dil petent e dallas personas che vegnan autorisadas dil petent da carrar il vehichel;~~

...

Remarca: Per conceder ina lubientscha ei sulettamein il document dil vehichel necessaris. Cun l'adattaziun digl art. 17 al. 2 sto ina copia dalla patenta da carrar buca pli vegnir aschuntada.

Proposta

Sin fundament dallas explicaziuns precedentas sco era quellas el messadi dils 30 d'uost 2023 fa la suprastonza communal las suandontas propostas al parlament communal:

- d'entrar ella fatschenta;
- d'approbar la lescha davart il traffic ed il parcar dalla vischnaunca Ilanz/Glion.

Ilanz/Glion, ils 28 da fevrer 2024

*Suprastonza communal Ilanz/Glion
Cumissiun lescha ed ordinaziun da traffic*